

Schituur mit dr Beatrice Willa ufs Seehore

Samstag, 19. März 2016 (*Ernst Eicher*)

Schituur mit dr Beatrice Willa ufs Seehore vom 19. März 2016

Äs isch noni so lang här, da simer no mit de Wanderschuhe ufz Seehore glüffe u heinis gfragt, wime äch do im Winter mit Schi chönni abefahre bi au dene unmüglech gformte Chempe.

Iz wüsse mir das natürlech!

11 Schiklübler simer gsi wo mir üs am Bahnhof z Oey-Diemtige begrüsst hei um zäme per Outo i Meniggrund zfare. Sobaud mir fertig agschieret si gsi, hetis Beatrice bi gäbigem Tämpo u wunderbarer Morgeschtimmig Richtig Seebärgsee gfuehrt. Dert acho heimer üs äs Verschnufpöiseli gönnt, si drna samt Fäu nidsi i Tausänki gfare, bevors du richtig az Seehore isch gange. Dr Ufschig isch bi Sunneschyn, tiptope Schneeverhältnis u gueter Spurlag de bis uf di einte oder andere Chnörz bide Schpitzcherine i de schteilere Häng gäbig gange. De weniger Tuureerfahrene hets du langsam afa gnüägele. Nach öpe 3½ Schtung isch du zGipfuchrüz gnussvou erreicht worde. Nacheme usgibige Mittagsrascht het du Beatrice gmüätlech mit zwone Froue ä günschtigi Abfahrt gwäut, dr Räscht vor Gruppe isch zirka ä Viertuschtung später o zure geeignete Abfahrtsroute ufbroche. Mit Jutze im schöne Puverschnee isch du das ä herrlechi Abfahrt fasch oni Schteine worde. Dr churz Gägeufschtig mit Uffäune vom Täli zum Seebärgsee hetis ernöit itz Schwitze bracht. De simer zimli i sanftem Gländ wider i Meniggrund abefahre. Dr Schnee isch du undeus bi däm mittlerwile doch warme Wätter äs bitzeli schwärer worde. Z Oey-Diemtigen ire schön agleite Gartewirtschaft hei mir dr Durscht glöscht, dBei gschtreckt u so isch dä herrlech Schitag du zum Ändi cho.

Merci Beatrice, sisch mega schön gsi!